



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVI No. 19
Oktubre 7, 2005
www.philippinerevolution.org

Editorial

Paslawon ang nagasingki nga pasismo sang rehimeng Arroyo

Nagapasingki nga pagtapna kag pasistang kalakasan ang ginahimo sang rehimeng Arroyo sa malaut nga katuyuan nga pungan kag pahipuson ang nagalapad nga panawagan sang pumuluyong Pilipino para tapuson na ang ginakangil-aran nga rehimen. Wala sing kon ano nga rason ini nga ginabawalan ang mga demonstrasyon sa karsada sa ngalan sang "*calibrated preemptive response*". Pareho sang isa ka diktador, ginbusalan ni Arroyo ang iya mga upisyal paagi sang Executive Order 464. Nagakadasma ini nga

him-uson ang hayagan nga pasistang pagginahum gani ginapadasig subong ang pagpasar sang Anti-Terrorism Bill nga nagaunod sang mga probisyon nga

katumbas sang layi militar.

Liwat nga ginabuhi ni Arroyo ang pasista nga sapat nga nagpanghalit sa panahon sang diktaduryang Marcos sa tuyo nga lapakon kag pahugon ang pumuluyo. Ginlapakan niya ang mga tawhanong kinamatarung, mga kahilwayan sibil kag mga demokratikong proseso. Ginapadayaw iniya ang pagpaluntad sang layi para lamang bastuson ini. Ginahimo niya ini tanan sa paglaum nga mahimo niya pahipuson ang pumuluyo kag pungan ang ila pag-alsa.

Nagahulag si Arroyo nga daw isa ka diktador. Parehas ni Marcos, ginpaidalum ni Arroyo sa iya gahum kag mayorya sang mga kongresista paagi sang pagbakal sang ila katampad. Nagamit niya nga kasangkapan ang mga ini para patyon ang prosesong *impeachment* kag pungan ang imbestigasyon sa pagdinaya sa nagligad nga eleksyon. Ginagamit niya sila subong agud padasigon ang pagaprubar sang Anti-Terrorism Bill. Isa na lamang ka "*rubber stamp*" ang Kongreso nga



Mga tampok sa isyu nga ini...

Isa ka M60, nakumpiska sg BHB sa Isabela
PAHINA 4

Mapiguson nga mga polisiya ni Arroyo
PAHINA 6

Pasistang kalakasan ni Palparan sa Central Luzon
PAHINA 13

taga-aprubar sang anuman nga ginapropener nga layi nga gusto iduso ni Arroyo.

Pareho sang desperado nga diktador, gusto man ni Arroyo nga kapitan sa liog ang tanan nga upisyal sang gubyrno kag militar. Ginabilang sila nga di-yabing robot nga magahulag lang santu sa iya gusto. Ang sin-o man nga magalalis ginapaandaman nga patalsikon sa trabaho kag pagasilutan.

Ang nagasingki nga mga pasistang tikang ni Gloria Arroyo palatandaan kon ano na kadesperado kag kon ano na kahuyang ang iya kapot sa gahum. Sa atubang sang tuman kasingki nga krisis nga nagabayo sa nagaharing sistema, indi na makahari si Arroyo sa daan nga pamaagi. Agud makapabilin pa sa poder, kinahanglan niya gamiton sang hayagan nga pasistang kalakasan agud piliton ang pumuluyo nga magpaidalum sa iya awtoridad.

Indi gid ini pahanugutan sang pumuluyo. Angkon nila ang matingkatad nga leksyon halin sa panahon sang diktaduryang Marcos nga ang sin-o man nga tirano kag matinaas-taason mapukan sang pumuluyo nga hugot nga nagahiliusa kag militante nga nagabatu. Indi tubtub



Ang nagasingki nga mga pasistang tikang ni Gloria Arroyo palatandaan kon ano na kadesperado kag kon ano na kahuyang ang iya kapot sa gahum.

san-o nakahari si Marcos sa pihak sang mas mabaskog niya nga kontrol sa militar. Labing indi magdugay si Arroyo sa atubang sang nagasingki nga demoralisasyon, pagkapihak-pihak sang AFP kag PNP kag pagpamatuk sa iya sang signipikanteng numero sang mga upisyal kag tinawo sang militar kag pulisya.

Pareho sang ginapakita sa nagligad nga mga adlaw, pursigido kag paliwat-liwat na pagahangkaton sang pumuluyo ang mga pasistang pagpang-ipit sa ila kahilwayan nga maglunsar sang mga aksyong protesta. Sa pagsingki sang pasismo sang rehimeng Arroyo, labing nagabilog ang malapad nga kaakig sang pumuluyo. Balewala ang pagposturang diktador ni Arroyo sa tion nga maglupok na pareho sang bulkan ang madassig nga natipon nga kaakig sang banwa sa iya pasismo kag pagpaantos sa pumuluyo.

Labaw sa san-o man sa nagligad, subong man ang tion nga dapat pasingkion pa sang Bag-ong Hangaway sang Banwa (BHB) ang mga taktikal nga opensiba. Ginkalipay sang pumuluyong Pilipino ang madinalagon nga opensiba sang BHB sa nagtaliwan nga mga simana. Inspirado sila nga labing pasanyugon ang ila mga paghimakas.

Ginabatyag sang rehimeng Arroyo ang madamu kag labi pa nga nagadamu nga magagmay kag dalagku nga pilas sini tuga sang mga taktikal nga opensiba sang BHB. Ang mga ini nagtuga sang kagamu, demoralisasyon kag pagkatulunga sa sulod sang AFP kag PNP. Ang mga ini nagakasantu nga silut sa isa ka tuman kapintas nga rehimen. Ang pinakamasupog nga mga pasistang kriminal ginasilutan kag naagum sang pumuluyo ang rebolusyonaryong hustisya. Ginabutong man sang BHB ang mga pasistang pwersa padulong sa mga patagawayan sa kaumhan agud mas halog kag hilway nga hayagan nga makaprotesta ang pumuluyo sa mga sentrong urban kag kabanwahanan.

Kapareho sang layi militar ni Marcos, ang subong nga mga pasistang tikang sang rehimeng Arroyo magabunga sang labi pa nga paglapad kag pagbaskog sang kalayo sang rebolusyonaryong paghimakas. Ginahayag sini sa pumuluyong Pilipino ang pasistang kinaiya nga yara sa ubod sang reaksiyunaryong estado. Ginatudlo sini sa pigos kag ginahimuslan nga mga sahi nga wala na sila sang iban nga madangpan kundi ang magkapot sang armas kag isulong ang armadong rebolusyon.

AB



Tuig XXXVI No. 19 Oktubre 7, 2005

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial

Paslawon ang nagasingki nga pasismo sg rehimeng Arroyo **1**

Madinalag-on na TO

Mga armadong aksyon sa Mindanao **3**

Kontra-reb, ginsilutan sg BHB **4**

Isang M60 naagaw sa Isabela **4**

Mga aksyong militar sa Bikol **5**

Pagpamigos sg rehimeng Arroyo **6**

Nagamu nga mga sundalo **9**

Kontrol sg US sa 'chacha' **10**

Arroyo, nagpakuno-kuno maki-mangunguma **12**

Pagpanghalit sg pasistang estado

Pasismo ni Palparan sa Central Luzon **13**

Lubong sg ginpatay nga lider-obrero **13**

5 lider-mangunguma, gin-aresto **14**

sa Negros Occidental **14**

Balita 14

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas



Mga armadong aksyon sg BHB sa Mindanao

Napulo'g walo ka suldado, pulis, elemento sang CAFGU kag abusado nga mga gwardya ang napatay sa 24 ka mga taktikal nga opensiba (TO) sang BHB halin Septyembre 30-Oktubre 3 sa Mindanao.

Indi man magnubo sa 13 tropa sang kaaway ang napilasan, suno sa pinakaulihi nga report ni Jorge "Ka Oris" Madlos, tagapamaba sang National Democratic Front-Mindanao. Isa ka M14, isa ka M16 kag apat ka *shotgun* ang naagaw. Siling ni Ka Oris, nag-ikit sa panahon nga gin-sambit ang mga armadong aksyon sang BHB sa isla halin isa tubtub duha kada simana pakadto sa isa tubtub duha kada adlaw.

Ang mga ginlunsar ng TO gin-nalakipan sang 18 operasyong is-nayping kag harasment batuk sa mga detatsment sang mga batalyon sang Philippine Army kag mga hed-kwarters, *command post* kag detatsment sang kumpanya; duha ka aksyong militar para mang-agaw sang armas, isa ka espesyal nga operasyon nga nagsamad sa duha ka tore para sa *signal intelligence* kag komunikasyon sang 4th ID, isa ka operasyong isparo batuk sa isa ka masupog nga operatibang paniktik, isa ka operasyon sa pagsilut batuk sa isa ka impormer, kag pag-agaw sang armas sang isa ka myembro sang milisya sang pumuluyo halin sa isa ka detatsment sang Philippine Army-CAFGU.

Pangunahon nga nangin target ang mga armadong pwersa sang reaksyunaryong guberno nga kilala sa paglapas sa tawhanong kinamatarung, ginakangil-aran sang masa kag imbolbado sa mga hilikuton kriminal batuk sa pumuluyo kag rebolusyonaryong hublag. Gani 20 sa 24 nga armadong aksyon amo ang batuk sa Philippine Army kag CAFGU kag tig-duha lang ang batuk sa mga

pwersa sang PNP. Isa man ka *security unit* nga imbolbado sa pagpang-agaw sang duta ang gintarget sang BHB.

Gin-ambusan sang BHB ang mga elemento sang PNP nga nakasakay sa guwa sang *armored personnel carrier* (APC) sa Mat-i, Surigao sadtong Setyembre 30. Apat ka pulis ang napatay, lakip ang isa nga naligsa sang APC sang maglumpat siya para maglikaw sa mga lupok. Apat ka pulis ang napilasan sa ambus.

Tatlong kaaway naman ang napatay sang salakayon sang BHB ang detatsment sang AFP-CAFGU sa San Pedro, Lianga, Surigao del Sur sadtong Septyembre 24. Hilway nga nakaatras ang mga Pulang hangaway matapos ang 15 minutos nga in-away.

Sa pareho man nga adlaw, hinaras sang mga Pulang gerilya ang isa ka kampo sang 30th IB sa Barangay Mahaba, Cabadbaran, Agusan del Norte, kon sa diin duha ka suldado ang napatay.


Gin-ambusan naman sang BHB sa North Central Mindanao ang mga abusado nga gwarda sang Ozamis Agricultural Development Inc. (OADI) Farms nga sakay sa isa ka salakyan sadtong hapon sang Septyembre 20 sa San Jose, Quezon, Bukidnon. Masupog nga manug-agaw sang duta ang tag-iya sang OADI Farms nga si Pablo Lobregat (himata sang mga Lobregat nga isa sa mga

pinakadaku nga agalon nga mayduta sa Zamboanga peninsula). Apat ka gwardya ang napatay kag nakump-iska sa ila ang isa ka ripleng M16 kag apat ka *shotgun*. Ang opensiba nga ini sabat sang BHB sa madugay na nga hingyo sang mga grupong Lumad sa lugar nga ginaagawan sang duta sang OADI.

Samtang, nadugangan sang isa ka M14 ang BHB sang agawon sini sang isa ka myembro sang milisya sang pumuluyo halin sa detatsment sang AFP sa Barangay San Luis, Agusan del Sur sadtong Septyembre 20.

Ginsamad naman sang apat ka tawong tim sang BHB sa idalum sang Eking Balacuit Command ang dalagku nga *antenna disc* sang tore sang komunikasyon sang 4th ID sa Ginabalan, Salay, Misamis Oriental sadtong Septyembre 25. Importante katama sa *intelligence* kag komunikasyon sang AFP ang nasambit nga *communication tower*. Mas o menos 300 metros lang ang layo sang mga tore sa detatsment sang 9th IB nga amo ang nagagwardya diri. Gab-i sang kumanduhon ini kag nagapamanag-banag na sang palukpan sang M14 kag Garand. Wala magbalos sang lupok ang kawaay.

AB





Masupog nga kontra-rebolusyonaryong kriminal, ginsilutan

Ginsilutan sang mga operatiba sang Ka Paking Guimbaolibot Red Partisan Brigade sadtong Septyembre 30 ang isa ka masupog nga kaaway sang masa kag rebolusyonaryong pwera sa Compostela Valley. Ang kriminal nga si Sgt. Martial "Jun" Colot sang Intelligence and Security Unit (ISU-Region XI) sang Philippine Army ginhusgahan sang korte sang pumuluyo nga nagkasala sang mabug-at nga krimen sa pumuluyo kag ginpanaungan sang silut nga kamatayon sa Purok 2 sang poblasyon sang Trento, Agusan del Sur. Nakumpiska sa iya ang isa ka .45 kalibreng pistola.

Ginsilutan si Colot bangud sa mahaba nga listahan sang mga utang nga dugo kag krimen batuk sa masa kag rebolusyonaryong hublag. Bilang nagapan-unga nga operatiba sang ISU, aktibo niya nga ginpamunuan ang isa ka kriminal nga hubon sang mga ahenteng paniktik sa pagpanalbeyds, pagtortur, pagpangkidnap, pagpangkilil kag pagpangharas sa mga rebolusyonaryong organisasyong masa.

Daku ang iya papel sa brutal na masaker sang "Mawab 4" sadtong Agosto 1999. Sa natabo nga ini,

ang nadakup nga kadre sang Partido nga si Godofredo "Ka Paking" Guimbaolibot, ang Pulang hangaway nga si Rolando Jubahib kag duha ka sibilyan gintortur kag ginpangpatay.

Daku man ang kahalabtanang ni Colot sa pagkidnap, pagtortur kag pagpatay sa "Maco 4"--mga pamatan-on nga aktibista nga sanday Marjorie Reynoso, Lito Doydoy, Ramon Ragase kag Jonathan Venaro-sadtong Setyembre 19, 2003.

Responsable man siya sa pagpatay sadtong 2001 kay Tatay Loloy, isa ka lider mangunguma sa Sityo Lower Buay, Barangay Baylo sa banwa sang Mongcayo. Sadtong tuig nga ini nagdirihir si Colot sang mga pagpanalakay batuk sa mga yunit gerilya sang BHB sa mga barangay sang Pasian kag Baylo sa nasambit nga banwa.

Sa Southern Mindanao Region panglima na subong nga tuig si Sergeant Colot sa mga operatiba sang ISU kag Intelligence Service of the AFP nga napamatud-an sang korte sang pumuluyo sang mabug-at nga krimen sa banwa. **AB**

Isang M60 naagaw, 8 sundalo napatay sa mga opensiba sang BHB sa Isabela

Walo ka suldado ang napatay kag indi maisip ang napilasan sa duha ka pagpanalakay sang Bag-ong Hangaway sang Banwa sa mga nagaoperasyon nga tropa sang gubyrno sadtong ulihi nga simana sang Septyembre sa Echague, Isabela.

Suno sa pinakaulihi nga report sang Benito Tesorio Command sang BHB sa Southern Isabela pito ka suldado ang kumpirmadong napatay kag indi



maisip ang napilasan sang salakayon sang mga gerilya sang BHB ang isa ka platoon nga mga suldado sang 45th IB nga nagapahuway sadtong Septyembre 24 sa Barangay San Carlos. Lakip sa mga napatay ang puno nga opisyal sang kaaway nga si 1Lt. Jerry Fernandez. Nakaagaw man ang mga Pulang hangaway sang isa ka M60 masinggan kag isa ka M14.

Isa man ka suldado, si Cpl. Norly Osorio ang napatay sa mas nau-na nga pagpanalakay sang BHB

sadtong Septyembre 22 sa Barangay Madadamian. Si Osorio kabahin sang duha ka platoon sang BHB nga nagaoperasyon sa lugar. Nakaagaw man ang BHB sang isa ka ripleng M16 kag nakaatras nga wala bisan isa ka kaswalti.

Ang duha ka taktikal nga opensiba nga ini ginlunsar bilang sabat sa panawagan sang sentral nga pamunuan sang Partido Komunista nga agawon ang inisyatiba kag pasingktion ang mga taktikal nga opensiba sa tunga sang nagalala nga krisis sang rehimeng US-Arroyo. Kabahin man ini sang kontra-opensiba sang BHB batuk sa padayon kag nagasingki nga mga operasyon sang AFP nga nagabiktima sa mga sibilyan sa Southern Isabela. **AB**



Mga aksyong militar sang BHB sa Bikol


Ginlunsar sa Bikol sang isa ka simana nga koordinadong aksyong militar halin Setyembre 28 tuhtub Oktubre. Kinse ka suldado ang napatay kag kinse man ang napilasan sa nasambit nga mga aksyon. Wala sang kaswalti sa bahin sang Bag-ong Hangaway sang Banwa (BHB).

Suno sa Romulo Jallores Command, nangin madinalag-on ang koordinadong kampanya militar bangud sa malapad nga suporta sang pumuluyong Bikolano sa BHB. Lubos nga nakibot ang mga pwersa sang AFP kag PNP sa mga sorpresang atake sang mga Pulang hangaway. Sa pihak nga bahin, pilit nga ginahinago sang 9th Infantry "Orgullo" Division sang Phillipine Army ang mga kalutusan sini sa kamot sang BHB sa Bikol. Ang tagapamaba sang 9th ID nga si Col. Serafin Raymundo ang pangunahon nga nagasabwag sang mga kabutigan nahanungod sa matuod nga resulta sang mga inaway sa tunga sang BHB kag AFP.

Siling ni Colonel Raymundo, wala kuno sang naangkon nga kaswalti ang AFP samtang madamu ang namatay kag napilasan sa kubay sang BHB. Kabaliskaran sini ang kamatuoran.

Baliskad sa pagpahambog sang AFP, duha ang napilasan sa kubay sang 42nd IB sang tuyuon nila nga lusubon ang isa ka yunit sang BHB sa Bicalen, Presentacion, Camarines Sur sadtong Hulyo 12. Nakilala ang mga napilasan nga sanday Corporal Salaun kag Corporal

Pascual sang Bravo Company sang 42nd IB. Makaligad ang duha ka adlaw, isa pa ka suldado ang napilasan sang isnaypingon sang BHB ang nag-alabutan nga reim-porsment. Ang labing naakig kag nataranta nga mga militar wala di-



reksyon nga nagpalupok sa nagkalain-lain nga direksyon.

Bangud sa daku nga kahuy-anan nga naangkon nila, nagtinguha magbawi ang mga militar. Ginpakutkot nila ang mga lulubngan sa sementeryo sang katambi nga baryo sang Maligaya, Caramoan, Camarines Sur kag ginsiling nga ang tanan nga bangkay nga wala sang kabaong mga myembro sang BHB. Ang mga ini ang ginapabugal nila nga nangin kaswalti kuno sa kubay sang mga Pulang hangaway.

Sini naman nga Agosto, apat ka suldado ang napatay sang mga Pulang hangaway sang tuyuon sang 7th Scout Ranger Company nga liputon ang isa ka iskward sang BHB sa Barangay Agpay, Guinobatan, Albay.


Sining Agosto gihapon, samtang nagaoperasyon ang mga tropa sang "C" Company sang 2nd IB sa Barangay Pawa, Matnog, Sorsogon; gin-isnayp sang isa ka tim sang BHB ang wala hinalung-ong nga mga kaway. Sa isa ka lupok, napatay ang puno nga upisyal sang kumpanya. Napilasan naman ang isa pa ka suldado.

Pilit naman nga ginapasiban-

gud sa BHB ang mga krimen sang mga elemento sang 9th ID. Isa ka insidente amo ang pagsalbeyds nila kay Pfc. Gilbert Halcon, isa nila ka tinawo sa Gubat, Sorsogon sining Agosto. Si Halcon ang *triggerman* sang militar sa pagpamatay sa mga sibilyan nga ginasuspetsahan nagasuporta sa rebolusyonaryong hublag. Imbolbado man siya sa serye sang mga pagpangholdap sa nasambit nga probinsya. Bangud nagalanog na ang krimen ni Halcon kag indi sarang takpan sang iya mga upisyal, mismo mga militar ang nagpatay sa iya.

Samtang, bunga sang mabaskog nga demoralisasyon, indi magnubo sa lima ka suldado ang basta lang naglayas (AWOL) sa AFP sa Bikol. Tatlo sini ang halin sa "A" Coy sang 42nd IB nga nakabase sa Garchitorena, Camarines Sur nga nag-AWOL sadtong Agosto. Antes ini, isa pa ka suldado halin sa "A" Coy sang 65th IB kag isa pa ka elemento sang CAFGU halin sa 4th Sorsogon CAA Company sang 22nd Cadre Battalion sang Philippine Army ang naglayas sadtong Hulyo.

AB



Mapiguson nga mga polisiya, sunod-sunod nga ginapatuman

Sang patyon ni Gloria Arroyo kag iya mga tinawo sa Kongreso ang proseso nga *impeachment* sadtong nagligad nga bulan, labi sini nga ginduso ang pumuluyo kag oposisyon nga dal-on sa karsada ang pagpatalsik sa iya. Ginatiko ni Arroyo ang reaksyunaryong layi sa pinakabaraghal nga paagi agud magserbi sa makitid niya nga interes kag magamit sa pagtapna sa tanan nga mga nagapamatuk sa iya.

Lakip sa mga ligal nga maniobra ni Arroyo ang "*calibrated preemptive response*" (CPR), ang Executive Order 464 kag ang ginadali-dali nga Anti-Terrorism Bill sa Kongreso. Tuyo sini nga pungan kag waskon ang nagasulong nga kahublagang pagpatalsik sa rehimeng Arroyo.

Hayagan nga paglapas sa mga sandigan nga kinamatarung sibil sang pumuluyo ang nasambit nga mga layi kag hagna. Lunsay kontra ang mga ini pati sa konstitusyon sang reaksyunaryong guberno.

Ugaling ginapamilit gihapon ini ni Arroyo sa katuyuan nga hatagan-rason ang paggamit sang kusog kag pagtapna sa mga nagapamatuk sa iya pagginahum kag agud makuha ang tanan nga gusto niya.

CPR. Lubos ka poderoso nga gindeklarar sang Malakanyang ang polisiya nga "*calibrated preemptive response*" sadto mismo nga Setyembre 21, ang ika-33 anibersaryo sang deklarasyon sang layi militar. Gin-anunsyo ni Executive Secretary Eduardo Ermita nga ginapabawal na ang mga rali nga wala permiso. Tuyo sini nga kontrolon kag sistematikong tapnaon ang sandigan nga kinamatarung sibil sang pumuluyo para sa hilway nga pagtilipon kag pagpahayag. Ginhatagan awtoridad man sini ang pulisya nga mangdakup indi lang sang mga aktibista nga nagarali kundi pati mga ginasuspetsahan pa lang nga nagapamuno ukon magatambong sa isa ka aksyong protesta nga tuyo bilan-

gon sang rehimen nga "iligal."

Sa ngalan sang CPR, wala pili ang kalakasan sang mga pulis batuk sa nagarali. Sadtong Oktubre 4, mapintas nga dinispers sang mga alagad sang Western Police District ang mga nagarali sa guwa sang Malakanyang. Lakip sa mga napilasan ang mga tawong-simbahan, mga myembro sang mga demokratikong organisasyon kag pati mga representante sang mga progresibong partido.

Imbes nga mapastras, liwat naglunsar sang aksyong protesta sang masunod nga adlaw. Wala untat ang kalakasan sang mga pulis sa mga nag-upod sa rali nga ginabansagan "*Walk for Democracy*" (Alay-Lakad para sa Demokrasya) nga ginapamunuan sang mga grupo nga tagpanggapin sang tawhanong kinamatarung. Mapintas man nga ginbungkag ang rali nga ginhiwat sa tulay sang Mendiola sadtong adlaw man nga ini. Madamu nga ralyista ang iligal nga gin-aresto kag mas madamu pa ang ginsakit. Bisan sa atubang sang midya, wala pili ang kapintas kag brutalidad sang mga pulis, lakip ang pag-atake sa isa ka tigulang nga babaye kag sa mga ralyista nga nagastras kag nadasma pa.

Sining Oktubre 6, ginpadayon sang Bagong Alyansang Makabayan kag Gloria Step Down Movement (GSM) ang martsa pakadto sa Mendiola sa pihak sang pagbalibad sang lokal nga guberno sang Maynila nga hatagan sila sang permit para magrali. Nagamartsa pa lang, gintuyo na sang mga pulis nga bungkagon ang kubay sang mga nagaprotesta. Ginbarikadahan sang mga pulis ang mga dalan agud pungan sila nga makapalapit sa Mendiola.


Indi madepensahan bisan sang mga tinawo ni Arroyo sa PNP ang kalakasan kag nagagrabang mga brutalidad sa pagbungkag sang mga "iligal" nga demonstrasyon. Gin-

dayaw mismo ni Secretary Ermita ang mga aksyon sang mga pulis sadtong Oktubre 5 sa manabaw nga dahilan nga "ginaamligan lang sang mga pulisya ang kinamatarung sang mayorya nga kontra sa pagpanggamu sang mga demonstrasyon. "

Labaw nga ginkaakig sang pumuluyo ang adlaw-adlaw nga kalakasan sang mga pulis sa lehitimo kag matawhay nga mga protesta. Sa atubang sang wala untat nga pagpanakit sang mga pulis, indi mag-untat ang ila pagsuay sa mga pasistang tikang sang rehimen kag pag-insister sa ila mga lehitimong kinamatarung tubtub sa dalayon nila mapatalsik si Arroyo sa pwesto.

Executive Order 464. Tanda sang desperasyon sang Malakanyang nga pungan ang pagbuyagyag sang dugang nga ebidensya nahanungod sa pagkadalagig ni Gloria Arroyo kag sang iya asawa nga si Mike sa lapnagon nga pagdinaya sa eleksyon 2004, dali-dali nga ginpagguwa sadtong Setyembre 28 ang Executive Order (EO) 464 nga hayagan nagabawal sa pagtestigo sa Senado kag Kongreso sang sin-o man nga upisyal sang kabinete, mga upisyal sang Armed Forces of the Philippines kag Philippine National Police kag mga upisyal sang mga ahensya sang pungsodnon nga seguridad.

Gintinguha nga ipalagas sang EO 464 agud pungan ang pagtestigo nanday Brig. Gen. Francisco Gudani kag Lt. Col. Alexander Balutan sa imbestigasyon nga ginahiwat sang Senado kaangot sa "Hello, Garci tapes". Pero wala sini mapungan ang pagbuyagyag sang duha nga mataas nga upisyal militar kaangot sa ila nasaksihan nga pagdinaya sang kampo ni Arroyo sa Mindanao sadtong nagligad nga eleksyon. Gi-



Sa atubang sang wala untat nga pagpanakit sang mga pulis, indi mag-untat ang ila pagsuay sa mga pasistang tikang sang rehimen kag pag-insister sa ila mga lehitimong kinamatarung tubtub sa dalayon nila mapatalsik si Arroyo sa pwesto.

natapalan man subong sang militar ang pagsuay sang duha ka upisyal sa EO 464 agud silutan sila.

Luwas sa pagpugong sa pagtestigo sang duha ka upisyal sang AFP, mas malapad nga katuyuan sang EO sang pagpugong sa pagtestigo sa Kongreso kag Senado sang madamu nga upisyal sa nagkalain-lain nga upisina sang gubyrno kaangot sang iban pang kaso batuk kay Arroyo kag sa iya rehimen. Bilang pagrason, ginatapalan sang Malakanyang sa pagpagguwa sang EO 464 ang pagpigis kuno sang Senado kay National Security Adviser Norberto Gonzales bunga sang iya pagbalibad nga sabton ang madamu nga yabing pamangkutanon sang mga senador bahin sa pinirmahan niya nga kontrata sa Venable LLP.

Masunod nga adlaw, gintapalan man ang EO 464 sa desperadong tuyo nga pungan ang mga testigo bahin sa maanomalya nga kontrata nga ginsudlan sang rehimen kaangot sa North Rail Project. Sa pihak sini, nagtestigo sa imbestigasyon ang pila ka propesor sang UP College of Law agud ibuyagyag ang mga nadiskubre nila nga anomalya sa proyekto.

Si Efren Gonzales, isa ka Assistant Government Corporate Counsel nga may kahalabtan sa proyekto ginpungan man sang nagadumala sang upisina niya nga magkadto sa bista, pero nagpadayon gihapon siya. Bangud sini, ginkandado ang upisina niya kag ginapaathag siya ngaa nagtambong siya sa nasambit nga bista nga wala pahanugot ang presidente.

Ginboykot man sang mga upisyal sang Dept. of Agriculture, Department of Agrarian Reform, Dept. of Trade and National Economic Development Authority ang pagbista sa Senado bahin sa kontrobersyal nga paggamit sang P2.8 bilyones nga pondo nga ginpadumalahan sa departamento para tani sa libre nga pagpanagtag sang abono sa mga mangunguma. Pero wala mapungan sang Malakanyang ang pagtestigo sang mga tiglawas sang Commission on Audit kadungan sang pagtestigo man sang mga tiglawas sang mga mangunguma.

Pati ang pagbista sa Senado bahin lang sa tuman kadamu nga mga adbertisement sa kalye wala gin-ulhot sang apat nga pangunahong upisyal sang kabinete ni Arroyo nga may kahalabtan diri, sanday MMDA Chairman Bayani Fernando, DPWH Sec. Hermogenes Ebdane, DILG Sec. Angelo Reyes kag DOT Sec. Leandro Mendoza.

Pero mabaskog ang pagpamatak sang EO 464 sang pila ka yabi nga tinawo ni Arroyo, lakip ang bag-o lang nagbiya nga Ombudsman nga si Simeon Marcelo. Ginapagguwa nga problema sa ikaayong lawas ang dahilan sang iya pagbiya. Indi kuno mabatas ni Marcelo ang pagpamilit ni Arroyo sa iya nga aregluhon na lang ang mga kaso nga ginpasaka sa Ombudsman batuk kay anay Justice Sec. Hernando Perez. Partikular diri ang pagbaton ni Perez sang P2 milyones nga suhol halin sa Impsa (Industrias Metakurgicas Pescarmona Sociedad Anonima), ang kumpanyang Argentina ginhatag

sang kontrata para sa rehabilitasyon sang Caliraya-Botocan-Kalayaan (CBK) *power plant complex* sa Laguna. Dalahig man sa kaso nga ini si Arroyo.

Anti-Terrorism Bill. Sa pihak sang wala-tuo nga pagpakamalaut sa mga anti-demokratiko kag kontra-pumuluyo nga tikang nga ini, liwat ginduso ang madasig nga pagpasar sang Kongreso sa nakapasaka Anti-Terrorism Bill (ATB). Ginahingalitan ni Arroyo ang kakugmmat nga dulot sang pagpamomba sa Bali, Indonesia sadtong Oktubre 2 para igarason ang kakinahanglanon kuno nga may ngipon kag mangin epektibo ang "gera batuk sa terorismo" ni Arroyo.

Dali-dali ini nga gin-aprubahan sang Justice Committee kag Foreign Affairs Committee sang Kongreso sining Oktubre 4 sang may madamu nga probisyon nga hayagan nga anti-demokratiko kag kontra-pumuluyo. Ginhimo ini nga bag-ong krimen ang "inciting to terrorism" (pagpanulsol sang terorismo). Sakup sini ang "mga pagpamulong-pulong, mga pagpahayag, sinulatan, mga bandera kag iban pa nga tulad sini nga may tuyo magsulsol sa iban padulong sa terorismo." Sa bag-ong bersyon sang ATB halin sa Kongreso, ang simple nga pagrali posible igabilang nga "terorismo."

Dugang pa, sobra-sobra nga gintiko kag labi nga ginpalapad

sang ATB ang kahulugan sang "terorismo" para maupod pati pamahug nga sa mga indibidwal. Tuman kalayo na ini sa matuod nga depinisyon sang terorismo, nga sistematiko nga paggamit sang kalakasan batuk sa sibilyan nga populasyon para sa pag-agum sang mga katuyuan pangpulitika ukon pang-ideolohiya. Gani ang ATB mabaskog nga ginapakamalaut sang mga eksperto sa layi nga nagasiling pilit sini nga ginasakup pati ang mga krimen nga daan nga sakup sang layi, pero mapanaug sang mas mabug-at nga silut bangud sa pagkategorya nga "terorista."

Kalakip man sa ginapasar nga bersyon sang komite ang mga probisyon kaangot sa pag-entra sa mga organisasyon nga ginabansagan nga terorista, mas mahaba nga detensyon para sa mga suspetsado bisan wala sang napasaka nga kaso, ekstradisyon kag deportasyon sang mga ginadudahan nga terorista, kag pagkriminalisa sa mga lehitimong aksyon kag pagpamtuk sang pumuluyo.

Ang mga probisyon nga ini ginsal-ot lamang sang mga tinawo ni Arroyo sa subong nga Kongreso kag wala sa orihinal nga hagna nga ginisponsor ni Rep. Roilo Golez sadtong nagtaliwan nga Kongreso. Bangud diri, gin-atras na ni Golez ang iya suporta sa nasambit nga hagna.

Wala sang probisyon sa subong nga hagna angot sa terorismo sang estado kag mga teroristang aksyon sang pulisya kag militar

nga mga numero uno nga terorista sa pungsod. Pagahimuon sini nga li-gal ang paghalughog kag pagkumpiska sang wala mandamyento kag iban pa nga pag-atake sa mga kinamatarung sibil sang pumuluyo.

Pagpang-ipit ni Arroyo sa mga kaaway sa pulitika. Wala-tuo man subong ang pagpang-ipit ni Arroyo sa mga kaaway sa pulitika, gamit ang anuman nga armas nga mahaboy kontra sa ila. Sa Senado, muklat nga nagpagamit bilang instrumento sang pangpang-ipit kandy Sen. Franklin Drilon kag anay Pres. Cory Cojuangco-Aquino si Sen. Miriam Defensor-Santiago. Ginapasibangdan sila ni Santiago sang pagplano sang kudeta kag asasinasyon kay Arroyo bisan wala man siya sang mahatag nga anuman nga ebidensya luwas sa impormasyon nga nabatian lang niya.

Pinakaulihi sa mapiguson nga tikang ni Arroyo amo ang pagmandu niya nga arestuhon kag ikulong si Bro. Eddie Villanueva, pinuno sang Jesus Is Lord Movement kag isa sa pangunahong kritiko ni Arroyo, base sa isa ka daan nga kaso sang *estafa*. Ginmandu man ang pag-aresto kay Samuel Ong, ang anay upisyal sang National Bureau of Investigation nga nagbuyagyag sang "Hello, Garci tapes". Ginkasuhan si Ong sang pagpanulsol sang sedisyon. Ginkalkal man ang mga daan nga kaso nanday Dinky Soliman kag Vicky Garchitorena, mga nagbiya nga myembro sang kabinete ni Arroyo.

Labi nga nahadlok si Arroyo sa nagalapad nga panawagan sang pumuluyo nga tapuson ang iya kontra-pumuluyo, kontra-demokratiko, maki-imperyalista kag pasistang rehimen. Gani ginahimo niya kag sang iya mga bayarang nga tinawo ang tanan agud mapahugot ang kapyot nila sa poder. Pero tanan nga mga tikang nga ini labi lang ginakaakig sang pumuluyo kag nagadabuk sa madamu nga pumuluyo nga maghulag kag magbatu.

AB



Nagamu nga mga suldado

Panibag-ong bunal sa nagakiya-kiya nga rehimen ang pagtestigo sang duha ka matag-as nga upisyal sang AFP kaangot sa baraghal nga pagdinaya nga ginhimo ni Gloria Arroyo kag iya asawa nga si Mike sadtong nagligad nga eleksyon.

Ginkumpirmar ni Brig. Gen. Francisco Gudani ang papel ni Com-elec Commissioner Virgilio Garcilano sa ginhimo nga pagdinaya sang kampo ni Arroyo sa Lanao del Sur. Ginkumpirmar man niya nga ginkakas siya bilang kumander sang 1st Marine Brigade kag Task Force Ranao, ginpabakasyon kag ginpahampang na lang sang *golf* tuga sang iya pagbalibad nga mangin kabahin sa pagdinaya nanday Arroyo kag Garcillano sa eleksyon sa sakup sang iya kumand kag gamiton para diri ang mga pwersang militar sa idalum sang iya pagpamuno. Ginpaambit ni Gudani nga personal nga nagdala kag nagpanagtag si Mike Arroyo sang tubtub P500 milyones sa Mindanao para siguruhon nga magadaug didto ang iya asawa. Nasaksihan niya ang mga ginhimo nga pagdinaya "halin sa umpisa tubtub sa katapusan " kag ang pagkadalahig diri sang madamu nga upisyal sang militar.

Suno naman kay Lt. Col. Alexander Balutan, pinuno sang 7th Marine Battalion sa idalum sang Marine Brigade ni General Gudani sadtong panahon sang eleksyon, ginmanduan siya kag si Gudani ni Lt. Gen. Roy Kyamko, kumander sadtong Southern Command, nga suportahan ang mga pagdinaya sa eleksyon sa Mindanao. Ginmanduan sila ni Kyamko nga "sundon ang *chain of command*" kag "halugan ang seguridad sa eleksyon." Pero malig-on nga nagbalidad lunsay sanday Gudani kag Balutan nga madalahig sa dinayaay.

Sadtong mismo nga adlaw sang pagtestigo sang duha ka upisyal militar sa Senado, ginpagguwa ni Arroyo ang mapiguson nga Execu-

tive Order 464 para pungan sila nga ibuyagyag ang ila mga nahibal-an. Gindeklarar mismo ni Gen. Generoso Senga, hepe sang AFP, nga iligal ang ila ginhimo bangud nagsuay sa *chain of command*. Ginkakas sila sa ila mga pwesto sa Philippine Military Academy. Ginpungan man ang nakatalana nga seremonya sa PMA para sa pagpasidunggog kay Gudani sa adlaw sang pagretiro niya sa AFP sadtong Oktubre 4 kag ginkuha sa iya ang tanan nga benepisyo nga mabaton tani niya sa iya pagretiro.

Nahibal-an sang duha ang mga desperadong tikang sang rehimen nga busalan sila kag iban pang suldado kag upisyal nga buot na maghalin sa bulok nga rehimen Arroyo. Indi sila mapungan kag labi lamang nagbakod ang ila determinasyon batuk sa rehimen sa pihak sang mga pagbalos sang Malakanyang.

Nag-ani sang malapad kag mabaskog nga pagpakamalaut ang pagpamigos kag pagpamahug sang rehimen halin sa nagkalain-lain nga sektor sang katilingban, lakip na ang nagkalain-lain nga grupo sang mga retiradong heneral kag matag-as nga upisyal sang AFP, mga rebel organisasyon sang mga bataon nga upisyal kag ordinaryong suldado. Siling ni Gen. Rodolfo Biazon, maabot

sa 10 pa ka upisyal sang AFP ang naka-handa nga magtestigo sa Senado agud kumpimahon ang mga ginbuyagyag nanday Gudani kag Balutan.

Nagadamu ang mga grupo kag indibidwal sa sulod sang AFP ang nagahulat na lang sang tama nga tion para hayagan mag-atras sang suporta kag maghulag para pukanon si Arroyo. Maabot sa 46 ka retiradong heneral ang hayagan nga nagpabutyag sang suporta sa mga pagbuyagyag nanday Gudani kag Balutan. Mas madamu pa nga bataon nga upisyal ang nagapahayag sang kahandaan nga magsuay sa *chain of command*. Suno sa ila, maabot sa 70% sang mga suldado sa AFP ang handa maghulag para patalsikon ang rehimen.

Gindayaw sang rebolusyonaryong kahublagan ang ginhimo nga pagtindog sang duha ka upisyal. Sa isa ka pahayag, ginsiling ni Gregorio "Ka Roger" Rosal, tagapamaba sang Partido Komunista sang Pilipinas, nga handa ang rebolusyonaryong kahublagan nga makig-alyansa kag magbuligay sa tanan nga elemento sang AFP nga nagahandum sang tunay ukon rebolusyonaryong pagbag-o sa katilingban. Sin-o man nga suldado ukon upisyal nga ginapigos sang rehimen mahimo mag-sulod kag mag-amuma sa diin man nga prenteng gerilya.

AB



Gen. Francisco Gudani

Kontrol sang US sa pagbag-o sa konstitusyon

Wala ni gamay nga pag-ulikid si Arroyo sang ibaligya ang soberan-sya sang Pilipinas kabaylo sang pagpadayon sang iya kagamhanan. Nagluhod-luhod siya sa US agud hingyuon ang pagpasilabot sini sa mga internal nga halambalanon sang Pilipinas, lakip ang pagbag-o sa sandigang layi sang reaksyunaryong gubyrno para mas mag-ayon sa kagustuhan sang US.

Ang desperadong tikang nga ini sang rehimen pinakaulihi lang sa nagalaba nga listahan sang mabaskog nga dahilan agud si Gloria Arroyo patalsikon sa poder kag sukton sa mga kasal-anan niya sa banwa.

Sining katung-an lang sang Setyembre nabuyagyag ang bahin sa likum nga pagsulod ni Arroyo sadto pang Hulyo 25 sa isa ka kontrata sa Venable LLP, isa sa mga nagapangu-na nga kumpanya sa pag-lobby (pagkumbinsi sa mga upisyal sang gubyrno nga suportahan ang mga partikular n g a

polisiya ukon tikang) sa US. Nakipagkontrata si National Security Adviser Norberto Gonzales sa Venable agud aregluhon sini sa kongreso kag iban pang yabing upisina sang US ang pagpangayo sang rehimen Arroyo sang basbas sang US kag pondo para sa pag-amyenda sa konstitusyon sang Pilipinas. Nagaabot sa \$75,000 (P4.2 milyones) kada bulan, ukon P50.4 milyones sa isa ka tuig ang bayad sa serbisyo sang Venable. Wala pa naisip diri ang dugang nga mga gasto sa pag-byahe, telepono, *fax*, *copying*, kag iban pa kag ang ginasingling bayad sa serbisyo propesyunal sang matag-as nga upisyal sang kumpanya nga nagaabot sa \$720 (P40,320) kada oras. Kon isipon ining mga dugang pa nga balayran, magadoble pa ang P50.4 milyones nga gasto.


Desperadong tikang ni Arroyo ang pagbag-o sang konstitusyon para masaylo diri ang atensyon sang publiko, madiskaril ang mga paghulag sang pumuluyo para mapatalsik siya kag makapabilin pa siya a poder sa tun-

ga sang nagabaskog nga disgusto sa iya sang pumuluyo. Nagasalig siya nga mabag-o ang porma sang gubyrno padulong kuno sa sistemang parlamentaryo kag pederal para magamit niya ini agud makapabilin pa sa pwesto.


Kabaylo sang pondo nga limos kag suporta sang US para sa iya rehimen, ginalauman ni Arroyo sa imperyalistang US ang mga pagbag-o sa konstitusyon sang gubyrnong Pilipinas. Ginahatagan- kahlawayan sang rehimen ang US nga waskon ang tanan nga nabilin nga mga probisyon nga nagapangapin sa soberanya sang pungsod kag kabaylo sini, makakas ang tanan nga sablag sa ila pagpanag-ya sang duta kag pagmamamuyong sang mga dumuluong nga imperyalista sa mga industriya kag dunang manggad sang Pilipinas.

Sa amo man, ginapaareglo niya sa Venable ang dugang nga mga pautang kag ayuda halin sa US nga pagagamiton para kuno mapataas ang ikasarang sang militar kag pulisya sa Pilipinas. Sa partikular, kinahanglan gid subong ni Arroyo ang dugang nga ayuda militar halin sa US para batuan ang rebolusyonaryong hublag, tapnaon ang pagbatu sang pumuluyo kag mapabaskog pa ang kapot niya sa militar kag pulisya, ilabi na nga kwarta man lang ang nagahigot sa iya sa pinakakuakot kag pinakamalaut nga mga upisyal sang AFP kag PNP.

Pagpasilabot. Ang kontrata sa Venable pinakaulihi lamang sa mga pagtraidor sa banwa ni Arroyo kahimbon ang mga dumuluong nga kumpanya kag ahen-



Pareho sang Venable, ang mga kumpanya nga ini nagagamit sa pagpasilabot sang US sa mga halambalanon pang-ekonomya kag pangpulitika sang Pilipinas.



nya. Bag-o gid makapungko ni Arroyo sadtong 2001, nakigbuligay na siya sa Agile Philippines nga aktibong nagapasilabot sa paghimo sang mga layi para sa halos tanan nga mahalalon nga halambalanon nga may angot sa ekonomya kag pinansya sa banwa. Ginapondohon sang USAID ang Agile Philippines.

Pinakamabug-at nga pagtraidor ni Arroyo sa banwa ang pagpasugot nga himuon nga base militar na sang US ang bilog nga Pilipinas paagi sa pagpasulod sang mga tropang pangkombat sang US sa nagkalain-lain nga lugar sa pungsod kag pagbukas sa kahawaan, dulungkaan kag kadutaan sa pungsod para sa hilway nga magamit sa mga operasyong militar sang US. Indi na kinahanglan pa ang pormal nga tratado, permanente nga istruktura kag mga natalana nga lugar.

Isa lang ang Venable LLP sa mga dumuluong nga kumpanya nga likum ginkontrata n Arroyo para sa lain-lain nga padihut niya agud makapabilin sa poder. Halin sang mabutang sa poder, naggasto na si Arroyo sang indi magnubo sa \$3.7 milyones ukion P208 milyones nga pangbayad sa mga kontrata niya sa walo nga magkatuhay nga dumuluong nga kumpanya kag mga espesyalista.

Apat sa mga kontrata nga ini ang nagaluntad tuhtub subong kag padayon nga ginabayaran. Ang iban pa nga kontrata nga ginsulod ni Arroyo nasentro sa pagpalig-on sang relasyon sang Pilipinas kag US, pag-imbatar sang mga dumuluong nga negosyante paagi sa paglaragway sa ila sang ilusyon nga

malig-on ang pulitika kag ekonomya sang pungsod, kag iban pa nga serbisyo nga direkta may benepisyo kay Arroyo, sa iya mga tinawo kag mga kaalyado nga lokal nga negosyante. Pareho sang Venable, ang mga kumpanya nga ini nagagamit sa pagpasilabot sang US sa mga halambalanon pang-ekonomya kag pangpulitika sang Pilipinas.

Handa nga mag-uyang sang kwarta si Arroyo para sa kaugalingon nga interes. Samtang padayon nga nagalugdang ang pungsod sa malubha nga krisis pang-ekonomya, samtang ginasablagan sang rehimen ni Arroyo ang matarung nga pagsaka sang sweldo sang mga mamumugon kag sweldo sang mga empleyado, samtang sige ang panawagan sang rehimen sa pumuluyo nga magkinot, walay huya nga naghahaboy naman ang rehimen sang daku nga kwarta kag nagpirma sa multimilyong piso nga kontrata sa mga dumuluong nga kumpanya para magpahamot sang imahen kag makakuha sang mga pabor sa US.

Tiko ang dila. Napasulod sa kontrata sa Venable si Arroyo paagi sang tampad sini nga suluguon kag ahente paniktik sang US nga si National Security Adviser Gonzales. Kon wala man ginlikum nanday Arroyo kag Gonzales ang kontrata pati sa iban pa nga myembro sang kabinite ni Arroyo, pati sa mga myembro sang National Security Council nga ginapasakupan ni Gonzales, sa abugado sang pangulo, sa Dept. of Foreign Affairs kag sa embahada sang Pilipinas sa US, nagakunokuno nga wala sang ihibalo sa kon-

trata.

Para likawan ang direktang pagkadalagig ni Arroyo, daw ginako tanan ni Gonzales ang responsibilidad sa pagsulod sang maanom-alya nga kontrata. Pero naga-utod-utod ang dila ni Gonzales sa paglikaw nga sabton sang diretso ang mga pamangkut sa imbestigasyon sa Senado sadtong Septyembre 21.

Matig-a nga nagbalidad si Gonzales nga sabton ang mga yabing pamangkot bahin sa pondo para sa kontrata, lakip ang ginhalinan sang pondo, pero nagbalibad siya nga hingalanan kon sanday sin-o ang mga ini nga suno sa iya si Pres. Arroyo lang ang nakahibalo.

Bunga sang mabaskog nga kaakig sa indi matago nga pagpapasente kag pagbinutig ni Gonzales, ginkastigo kag ginditiner siya sang mga senador bangud sa wala respeto niya sa Senado bangud sa pagbalibad nga magsabat sang maayo sa mga pamangkot sa iya. Nagdrama siya nga inatake siya sang altapresyon kag ginhimbon pa sang Malakanyang ang iya doktor para pagguwaon gilayon nga operahan siya sa tagipusuon; pero kinahanglan hilwayon anay sang Senado. Ginamit sang Malakanyang ang drama ni Gonzales para pagguwaon nga ginapigos kag ginpahuy-an sang mga senador.

Bangud sa pagkabuyagyag, napilitan nga kanselahon sang Malakanyang ang kontrata sa Venable. Pero kinahanglan man bayaran ang tanan nga naggasto sang Venable. Indi man mabawi ang pauna nga tatlo ka bulan nga bayad.

Samtang, ang drama ni Gonzales amo ang ginatapalan ni Arroyo para makapagguwa sang isa ka Executive Order 464 nga nagabawal na sa pagtestigo sa Kongreso sang sin-o man nga upisyal sang sangay ehekutibo sang gubyrno, militar kag pulisya, nga wala pahanugot sang presidente. AB

Arroyo, nagapakuno-kuno nga maki-mangunguma

Pagagamiton kag himuon ni Gloria Arroyo ang tanan para makapabilin sa pwesto. Sa katuyuan nga ipiton si Corazon Cojuangco-Aquino, nga sugod sadtong Hulyo nagkig-isa sa malapad nga panawagan para sa pagbiya si Arroyo, ginpaguwa sang Departament of Agrarian Reform (DAR) ang rekomendasyon nga ibasura ang kontrata sa tunga sang mga mangunguma sa Hacienda Luisita kag sang pamilyang Cojuangco sa idalum sang iskemang *stock distribution option* (SDO) bunga sang matingkad nga paglapas sang pamilyang Cojuangco sa mga probisyon sini.

Indi matago sang DAR ang pagkamatarung sang paghimakas sang mga mangunguma kag mamumugon sa uma sa HLI gani naobligar ini nga ipagguwa ang rekomendasyon. Ginabukas sini ang ligal nga basehan para labi pa nga isulong ang madugay na nga pagpanikasog para sa lubos nga pagbasura sang SDO kag pagpaidalum sang HLI sa tunay nga reporma sa duta.

Pero duda mismo ang mga mangunguma kag mamumugon sa uma sa HLI kon may yara ini nga malahalangon nga igabunga para sa ila madugay na nga paghimakas para sa tunay nga reporma sa duta. Lubos nila nahangpan nga kinahanglan pa

nila nga pursigidong maghimakas kag magsakripisyo.

Nahibal-an gid nila sa nagtaliwan kahimbon sang mga Cojuangco si Arroyo sa pagpalig-on sang SDO sa HLI. Duguon man ang kamot ni Arroyo sa pagmasaker sa mga mangunguma kag mamumugon sa uma sa piketlayn sa asyenda sadtong Nobyembre 2004 kag sa wala untat nga pagpamahug kag kalakasan batuk sa ila kag mga tagasuporta nila.

Gani nahibal-an nila nga ginagamit lamang ni Arroyo ang ila matarung nga paghimakas agud ipiton si Corazon Aquino kag tungaon ang malapad nga

nagahiliugyong prente anti-Arroyo. Ang pinal nga desisyon sa kaso sang HLI yara sa kamot sang Presidential Agrarian Reform Council (PARC) nga direkta ginapamunuan ni Arroyo. Ginalau-man nga ang mangin desisyon sang PARC igatakda hindi sang pagkamatarung sang paghimakas sang mga mangunguma kag mamumugon sa

uma kundi sang pangpulitika nga negosasyon kag inaway sa tunga ni Arroyo kag mga Cojuangco. Wala ni gamay nga interes si Gloria Arroyo nga resolbahon ang halambalanon sa Hacienda Luisita pabor sa mga mangunguma.

Baliskad sa madugay nga demanda sang mga mangunguma nga ibusara ang iskemang SDO, ang rekomendasyon sang DAR amo ang pagpalig-on pa sini. Gintarget lamang sini ang HLI kag ang mga "paglapas sini sa kontrata". Mahalong katama si Arroyo nga kwest-yuhnon ang mismo SDO bangud malapad nga kadutaan sang dalagku nga agalon n ga mayduta ang makalusot sa Comprehensive Agrarian Reform Program (CARP) kag napabilin sa ila kamot paagi sa iskema nga ini.

Lakip diri ang masobra 300 ek-taryas sang pamilya ni Mike Arroyo sa Negros kag ang ginatos kalibo nga ek-taryas nga kadutaan ni Eduardo "Danding" Cojuangco sa Negros kag Isabela nga lunsay nakapaidalum sa daw SDO nga "corporative scheme." Padayon nga ginabuyok kag ginahatagan-pabor ni Arroyo si Danding para padayon niya nga agumon ang suporta sini sa pulitika kag indi ini magpareho sa pakaisa niya nga si Corazon Aquino nga nagsaylo sa oposisyon.

Indi man ini ang una nga kahigayunan nga gingamit ni Arroyo ang masang mangunguma para sa kagalingon nga interes. Nabuyagyag sining karon lang ang anomalya nahangungod sa P2.8 bilyones nga pondo sang Ginintuang Ani nga nakatalana sa subsidyong abono para sa mga mangunguma. Sa baylo nga ibakal sang abono, nagkadto ang pondo sa mga palit nga non-government organizations nga kapot ni National Security Adviser Norberto Gonzales kag iban pang suluguon sang Malakanyang, kag gingamit sa pagpangampya ni Arroyo sadtong 2004.

AB





Pasistang kalakasan, ginsuguran na ni Palparan sa Central Luzon

Wala mag-usik sang panahon ang berdugo nga si Brig. Gen. Jovito Palparan antes siya magsabwag sang pasistang kalakasan sa bag-o niya nga destino sa Central Luzon.

Umpisa sadtong Setyembre 1, insigida pagkadestino sa iya bilang hepe sang 7th ID nga nakabase sa Fort Magsaysay, Nueva Ecija, pito na ka lider masa kag aktibista sa Central Luzon ang ginpatay. Una nga nangin biktima sang pagpanalbyeds ang isa ka lider sang Pinag-isang Samahan ng Tsuper at Opereytor Nationwide nga pinatay sa Norzagaray, Bulacan makaligad ang malaparan nga untat-pasada sa rehiyon sadtong Septyembre 12. Ginpatay man sadtong Septyembre si Jose Levimar Rieza, isa ka residente sang Orani, Bataan, kag duha ka aktibistang Aeta sa banwa sang Abucay sa parehong prubinsya.

Pinakaulihi nga mga biktima ang duha ka myembro sang Anakpawis sa Nueva Ecija kag isa ka *coordinator* sang Bayan Muna (BM) sa Tarlac. Ginpatay sining Oktubre 7 sa Victoria, Tarlac si Rolando Mariano, BM *coordinator* sang Gerona sa parehong prubinsya. Ginpatay si Armando Javier Jr. sa iya balay sa Barangay Sta. Clara, Cuyapo, sadtong gab-i sang Oktubre 2. Halos duha ka oras antes sini, ginkidnap si Cecilia Esteban sa iya balay sa Barangay Lennec, Guimba. Nakit-an siya nga wala na sang kabuhi sa banwa man sang Guimba sining Oktubre 5.

Naimbolber si Palparan sa 199 kaso sang pagpamatay, napaslawan nga pagpatay, tortyur, pagpamakol kag arbitraryong pag-aresto kag detensyon sang mga sibilyan kag tagasakdag sang tawhanong kinamatarung sang gintalana siya bilang hepe sang 8th ID sa Eastern Visayas. Nadestino siya diri

umpisa Pebrero tuhtub Agosto 2005. Ginsaylo siya sa Central Luzon sang gin-insister sang pumuluyo sa Eastern Visayas nga patalsikon na siya sa rehiyon.

Antes ini nakalista ang



organisasyon sang Karapatan sang 326 kaso sang paglapas sa tawhanong kinamatarung sa Oriental Mindoro sadtong panahon nga hepe sang 204th Infantry Brigade si Palparan didto umpisa 2001 tuhtub 2004.

Bangud sa iya madugo nga rekord sang pagpangtapna sa mga militante kag progesibong pwersa kag mga ginadudahan tagasuporta sang rebolusyonaryong kahublagan, padayon nga ginapadyaan ni Gloria Arroyo sang mga promosyon kag medalya si Palparan.

AB

Linibo nag-upod sa lubong sang ginpatay nga lider mamumugon

Nag-abot sa 2,000 mamumugon, mga abyan kag tagasuporta halin sa Cavite, Quezon, Batangas, Rizal kag Metro Manila ang nagdagsa sa Calamba, Laguna sadtong Setyembre 29 agud idul-ong sa lulubngan ang bangkay sang ginpatay nga lider-obrero nga si Diosdado "Ka Fort" Fortuna, 50.

Gindunganan sang mga hublag protesta sang mga mamumugon kag kadampig sa National Capital Region (NCR), Central Luzon, Bikol, Cebu, Davao kag iban pang bahin sang Mindanao ang lubong. Antes ini, gin-haya ang bangkay ni Ka Fort sa University of the Philippines sa Quezon City. Plano tani nga imartsa ang bangkay padulong Mendiola para ipamilit sa anti-mamumugon nga rehimeng Arroyo ang hustisya para sa pagpatay sa beterano nga unyonista. Gin-abangan sang mga pulis ang martsa bag-o ini makaabot sa Mendiola.

Ginluthang tuhtub sa mapatay si Ka Fort sa iya balay sa Barangay Paciano, Rizal, Calamba sadtong hapon sang Setyembre 22 sang mga armadong lalaki nga ginapatihan militar. Nakahalin gid lang niya sa piketlayn sang mga mamumugon sang Nestle-Filipro sa Cabuyao, Laguna, nga yara sa ikatlong tuig na sang ila welga. Si Ka Fort ang ikaduha nga pangulo sang Union of Filipino Employees-Drug and Food Alliance (UFE-DFA) nga ginpatay. Nagbulos siya kay Mel Roxas nga pinatay sadtong 1989.

Mabaskog nga ginpakamalaut sang mga mamumugon ang pagpatay kay Ka Fort. Ginkundenar man nila ang paghipos sang administrasyong Arroyo, kag sa partikular, ni Sec. Patricia Sto. Tomas sa kaso nga ini.

Samtang, isa ka sulat-petisyon nga nagakundenar sa pagpatay kay Ka Fort ang ginpirmahan sang mga aktibista nga nagtambong sa daku nga rali nga anti-gera sa Washington D.C. Sadtong Septyembre 24. Mainit nga ginsuportahan sang mga demonstrador ang petisyon. Isa sa mga pumirma amo si Jessica Lange, isa ka premyado nga artista sa US.

AB



Lima ka lider-mangunguma, gin-aresto sa Negros Occidental

Mabaskog nga ginkundenar sang Kilusang Magbubukid ng Pilipinas (KMP) ang pagkaaresto sang lima ka upisyal kag duha ka myembro sang organisasyon sa tsekpoynt sang 12th IB sa Barangay Camingawan, Kabankalan City, Negros Occidental sadtong Setyembre 30. Gindakup sanday Morito Dionson, konsultant sang KMP; Marilou kag Abraham Villanueva, mga organisador sang KMP; Charity Villar, organisador sang KMP-Amian; Danny Dayanan, organisador sang Teatro Obrero; kag ang ila upod nga sanday Jermie Gelligan kag Rico Abrasaldo.

Arbitraryo sila nga gindalahig sa pagsalakay sang BHB sadtong Setyembre 27 sa detatsment sang militar sa Barangay Haba, Candoni, sa parehong prubinsya. Suno sa mga report, ginpatumtuman sila sang mga baril, ginbuta-butahan kag ginpahapa. Ginbulag

man sa grupo si Dionson kag ginsakay sa isa ka *van* nga nagpadulong sa wala mahibal-i nga destinasyon.

Sa epekto sang petisyon nga *habeas corpus* nga ginpasaka sa Kabankalan Regional Trial Court (RTC), ginhilway sang militar ang lima sad-

tong Oktubre 5. Pero pila ka oras pagkaligad sini, ginhunong sila sa Provincial Jail sa Bacolod City bangud sa anum ka nagkalain-lain nga kasong kriminal nga ginpasaka sa Ilog-Candoni Municipal Trial Court kag Kabankalan RTC.

Suno sa KMP kag Karapatan-Negros, naghalin ang mga biktima sa isa ka pulong sang KMP sa Dumaguete City kag pabalik na sila sa Bacolod sang sila ginabangan sa tsekpoynt kag dakpon. Nagpasaka man sang kaso ang KMP sa korte agud ipamilit ang pagpahilway sa mga gin-aresto. AB

JASIG, liwat ginsuspendir sg GRP

MABASKOG nga ginpakamalaut sang National Democratic Front of the Philippines (NDFP) ang basta na lamang nga pagsuspendir sang rehimeng Arroyo sa Joint Agreement on Safety and Immunity Guarantees (JASIG) nga nagahatag proteksyon sa tanan nga myembro, konsultant kag istap sang *negotiating panel* batuk sa pag-aresto. Suno kay Luis Jalandoni, pinuno sang *negotiating panel* sang NDFP, ang suspensyon lapas sa gintalana nga proseso. Kon gusto sang rehimen nga kuhaon na ang JASIG, nga katumbas sang pagbasura na sang sugilanon pangkalinungan mismo, kinahanglan sini nga maghulat sang 30 adlaw, siling niya. Ang pamahug nga dala sini nga gilayon arestuhon ang sin-o man nga katapu, konsultant ukon istap sang NDFP panel nagapakita lang sang kaluibon kag kawad-on sang respeto sang rehimen sa mga kasugtanan kag sa sugilanon pangkalinungan.

Padayon nga ginatiko sang rehimeng Arroyo ang nangin resulta sang impormal nga pagsugilanon sadtong nagligad nga bulan agud hatagan-rason ang paltik nga suspensyon sang JASIG. Suno sa GRP, ang suspensyon sang JASIG sabat sa padayon kuno nga pagpamalibad sang NDFP nga magsugilanon liwat.

Liwat nga gin-athag ni Jalandoni nga wala tubtub san-o nagtalikod ang NDFP sa sugilanon pangkalinungan. Ginpahigad lamang sini ang pormal nga pagpakigsugilanon sadtong nagligad nga bulan agud hatagan sang panahon ang GRP nga magtuman sa nauna nga mga kasugtanan. Nagapabilin nga bukas kag handa ang NDFP nga liwat buksan ang pormal nga sugilanon pangkalinungan.

Gen. Jarque kag asawa, ginbastos, ginhunong kag gindeport sang US

GINBASTOS kag gintrato nga daw hayup sang US Immigration, Homeland Security kag lokal nga pulis sanday (ret.) Gen. Raymundo Jarque kag iya asawa sadtong Setyembre 22.

Ginabisita sang mag-asawa nga Jarque ang ila anak kag mga paryente sa US dungan sang pagpabulong ni Gng. Xenia Jarque. Pero pagpanaog pa lang nila sa eroplano sa Dallas, Texas, gindetiner na sila sang US Immigration. Sa sulod sang 24 oras, ginpaidalum sila sa mahaba nga interogasyon antes ginhunong. Ginseparar sila, gin-ubahan kag ginpasuksukan sang beste sang preso. Wala sila gintugutan nga magpaligo kag wala man gintugutan nga mag-inom sang bulong si Gng. Jarque. Bilog nga adlaw sila nga wala gintugutan nga makasugilanon sa ila mga paryente ukon abugado. Nasugilanon na lang nila ang ila mga paryente antes sila ideport sang US.

Mabaskog nga ginkundenar sang NDFP ang ginhi-mo pagpangbastos sang US sa mag-asawa nga Jarque. Suno kay Ka Luis Jalandoni, tagapangulo sang NDFP *peace panel*, arbitraryo nga ginbansagan nga terorista si General Jarque, kag bangud sini, gintrato siya kag ang iya asawa nga daw hayup. Siling niya, ini bisan isa sa ila wala man maakusahan ng naghimo sang anuman nga krimen batuk sa US ukon sin-o nga pumuluyo sini sa US ukon sa diin man nga bahin sang kalibutan.

Ginkundenar man sang NDFP ang rehimeng Arroyo sa pagpakighimbon sini sa US kag sa pagpahanugot sa US nga magpasilabot sa Pilipinas.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon

Tuig XXXVI No. 19

Oktubre 7, 2005

www.philippinerevolution.org

Editorial

Biguin ang umiigting na pasismo ng rehimeng Arroyo

Nagapasingki nga pagtapna kag pasistang kalakasan ang ginahimo sang rehimeng Arroyo sa malaut nga katuyuan nga pungan kag pahipuson ang nagalapad nga panawagan sang pumuluyong Pilipino para tapuson na ang ginakangil-aran nga rehimen. Wala sing kon ano nga rason ini nga ginabawalan ang mga demonstrasyon sa karsada sa ngalan sang "*calibrated preemptive response*". Pareho sang isa ka diktador, ginbusalan ni Arroyo ang iya mga upisyal paagi sang Executive Order 464. Nagakadasma ini nga

him-uson ang hayagan nga pasistang pagginahum gani ginapadasig subong ang pagpasar sang Anti-Terrorism Bill nga nagaunod sang mga probisyon nga

katumbas sang layi militar.

Liwat nga ginabuhi ni Arroyo ang pasista nga sapat nga nagpanghalit sa panahon sang diktaduryang Marcos sa tuyo nga lapakon kag pahugon ang pumuluyo. Ginlapakan niya ang mga tawhanong kinamatarung, mga kahilwayan sibil kag mga demokratikong proseso. Ginapadayaw iniya ang pagpaluntad sang layi para lamang bastuson ini. Ginahimo niya ini tanan sa paglaum nga mahimo niya pahipuson ang pumuluyo kag pungan ang ila pag-alsa.

Nagahulag si Arroyo nga daw isa ka diktador. Parehas ni Marcos, ginpaidalum ni Arroyo sa iya gahum kag mayorya sang mga kongresista paagi sang pagbakal sang ila katampad. Nagamit niya nga kasangkapan ang mga ini para patyon ang prosesong *impeachment* kag pungan ang imbestigasyon sa pagdinaya sa nagligad nga eleksyon. Ginagamit niya sila subong agud padasigon ang pagaprubar sang Anti-Terrorism Bill. Isa na lamang ka "*rubber stamp*" ang Kongreso nga



Mga tampok sa isyu nga ini...

Isa ka M60, nakumpiska sg BHB sa Isabela
PAHINA 4

Mapiguson nga mga polisiya ni Arroyo
PAHINA 6

Pasistang kalakasan ni Palparan sa Central Luzon
PAHINA 13

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com